

Na osnovu člana 39. Zakona o kantonalnoj upravi („Službene novine HNK“, broj: 11/99), člana 20. Zakona o organizaciji organa uprave u F BiH („Službene novine F BiH“, broj: 35/05), a u vezi sa članom 3. stav 1. Zakona o uslovima i načinu obavljanja djelatnosti rezanja drveta („Službene novine F BiH“, broj: 27/97,25/06), kantonalni ministar privrede, uz saglasnost Vlade HNK, d o n o s i

P R A V I L N I K

O STRUČNOJ KOMISIJI ZA VRŠENJE TEHNIČKOG PREGLEDA POSLOVNIH PROSTORIJA PRAVNIH LICA KOJA SU REGISTROVANA ZA OBAVLJANJE DJELATNOSTI REZANJA DRVETA U PILANAMA, TE VISINI I NAČINU PLAĆANJA NOVČANE NAKNADE ZA RAD KOMISIJE

I OPĆE ODREDBE

Član 1.

Ovim Pravilnikom se utvrđuje sastav stručnih Komisija za vršenje tehničkog pregleda poslovnih prostorija pravnih lica koja su registrovana za obavljanje djelatnosti rezanja drveta u pilanama (u daljem tekstu: Komisija), te visina i način plaćanja novčane naknade za rad Komisije u postupku izdavanja odobrenja za obavljanje djelatnosti rezanja drveta.

II SASTAV STRUČNE KOMISIJE

Član 2.

Komisiju imenuje ministar Ministarstva privrede HNK (u daljem tekstu:Ministar).

Član 3.

Komisiju čine: predsjednik, te 2 do 6 članova, u zavisnosti od veličine objekta i složenosti postupka.

Rješenjem kojim Ministar imenuje Komisiju imenuju se predsjednik i svih 6 članova.

Predsjednik Komisije, u saradnji sa voditeljem postupka, u svakom pojedinačnom slučaju, određuje sastav Komisije, a što će unijeti u zapisnik.

Član 4.

Članovi Komisije moraju imati stručnu kvalifikaciju najmanje VII stepen, i to: protivpožarne, ekološke, građevinske, mašinske i elektrotehničke, te zaštite na radu, zdravstveno-sanitarne ili pravne struke.

Najmanje jedan član mora imati stručnu spremu i praksu, koja je određena za lica koja mogu raditi tehničku dokumentaciju za građevinu u koju su smještene mašine i oprema za obavljanje djelatnosti rezanja drveta.

Član 5.

Broj članova i sastav Komisije Predsjednik Komisije određuje prema veličini i složenosti instalisanog kapaciteta za rezanje drveta, i to :

1. MALI pilanski kapaciteti - stacionarne pile i mini gateri sa niskim stepenom mehaniziranosti (tračne i kružne) godišnjeg proreza do 3.000 m³ oblovine - Predsjednik Komisije i 2 člana;
2. SREDNJI pilanski kapaciteti - stacionarne pile trupčare i gateri sa srednjim stepenom mehaniziranosti, godišnjeg proreza do 10.000 m³ oblovine - Predsjednik Komisije i 4 člana;
3. VELIKI pilanski kapaciteti – mehanizirana linija trupčara i gatera sa uređenom popratnom opremom, uređajima i instalacijama, godišnjeg proreza preko 10.000 m³ oblovine - Predsjednik Komisije i 6 članova.

III VISINA PLAĆANJA NOVČANE NAKNADE

Član 6.

Novčana naknada za rad Komisije (u daljem tekstu: novčana naknada) obuhvata troškove rada Komisije, u zavisnosti od veličine složenosti kapaciteta za rezanje, a iznosi:

1. za MALE pilanske kapacitete.....od 1.500,00 KM do 2.000,00 KM;
2. za SREDNJE pilanske kapacitete.....od 2.500,00 KM do 3.000,00 KM;
3. za VELIKE pilanske kapacitete.....od 3.500,00 KM do 4.000,00 KM.

Kod posebno složenih predmeta, koji zahtijevaju više uviđaja na lice mjesta (prethodni i naknadni uviđaji), naknada iz stava 1. ovog člana može biti uvećana najviše do 30% maksimalnog iznosa svakog pojedinačnog kapaciteta.

Član 7.

Visinu novčane naknade utvrđuje Ministar na osnovu troškovnika, kojega sačinjava predsjednik Komisije za svaki konkretni slučaj, uzimajući u obzir kapacitet objekta, uloženi rad Komisije i složenost opremljenosti objekta.

Troškovnik iz prethodnog stava sastavni je dio zapisnika o radu Komisije.

Član 8.

Od ukupno uplaćenog iznosa novčane naknade isplaćuje se do 70% kao naknada članovima Komisije koji su vanjski saradnici za rad i podmirenje zakonom propisanih poreza i doprinosa, a za članove Komisije koji su državni službenici i namještenici u skladu sa Odlukom Vlade o načinu obrazovanja i visini naknade za rad stručnih komisija i drugih radnih organa obrazovanih od strane Vlade HNK i rukovodilaca kantonalnih organa državne službe ("Službene novine HNK", broj:7/06) .

IV NAČIN PLAĆANJA NOVČANE NAKNADE

Član 9.

Novčanu naknadu plaća stranka po čijem se zahtjevu za odobrenje obavljanja djelatnosti rezanja drveta pokreće postupak, na žiro račun Budžeta Hercegovačko-neretvanskog kantona.

Član 10.

Novčanu naknadu podnosilac zahtjeva uplaćuje prije izlaska Komisije na uvidaj, što dokazuje kopijom uplatnice.

Eventualni dodatni troškovi naknadnih uvidaja iz stava 2. člana 6. ovog Pravilnika, koji ne mogu biti utvrđeni troškovnikom, biti će utvrđeni posebnim zaključkom.

V PRELAZNE I ZAVRŠNE ODREDBE

Član 11.

Rješenje iz člana 2. ovog Pravilnika Ministar je dužan donijeti u roku od 3 mjeseca od dana stupanja na snagu ovog Pravilnika.

Član 12.

Ovaj Pravilnik stupa na snagu osmog dana od dana objavljivanja u „Službenim novinama HNK“.

Broj: 07-01-02-250/08
Mostar, 25.07.2008.godine

Ministar

Esad Humo